



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

US nung COVID-19 agi asür nisung 500,000 jungogo

TAPAK 3

Manipur CM Biren Singh-i Captain SM Rangnamei nem tenüngsang agütsü

VOL. XVIII NO. 131 (ADOK 131) DIMAPUR

RASEMNÜ (WEDNESDAY) TSÜKLAI (FEBRUARY) 24, 2021 ₹ 5.00

COVID-19 Nagaland: Shinga dak meputet; Taneptsü angura maliasü

Kohima, February 23 (TYO): Mongulbarnü Nagaland nung nisung ka dak danga COVID-19 aliba meputet aser taneptsü angura ka danga maliasü.

"Tanü nisung shinga dak COVID-19 aliba meputet" ta Health & Family Welfare Minister, S Pangnyu Phom-i ashi.

Nagaland nung nisung 12,192 dak putetba nungi 11,937 taneptsü nguogo aser tang parnok 12 anepaludar. COVID-19 puteter nisung 91 asüba nungi parnok 10 bo tanga timtem ajanga asüba liasü,

ta Health & Family Welfare Director, Dr Denis Hangsing-i metetdaksü.

Nagaland nung COVID-19 nungi taneptsü angurji 97.9% lir aser parnok 152 tashi tanga state temi ogo, ta paisa ashi.

"Nagaland nung COVID-19 alitsü akok ta temolung melemi bilemba sample 1,29,522 tendangogo. RT-PCR ajanga sample 74,613, TrueNat ajanga sample 37,325 aser Rapid Antigen Test ajanga sample 17,584 tendang" ta Dr Hangsing-isa daily COVID-19 bulletin nung metetdaksü.

Harsh Vardhan-i Mon nung Medical College atema lung azüngtsütsü

Dimapur, February 23 (TYO): Union Minister for Health and Family Welfare, Dr. Harsh Vardhan-i February 26, 2021 anepdang 10:00 ako nung District Hospital Mon nung Medical College yanglutsü atema lung azüngtsütsü.

Yaküm September ita Health & Family Welfare Minister Pangnyu Phom-i District Hospital Mon nung Government Medical College lapoktsü molunga agizükba osang metetdakja liasü.

Nagaland sorkari iba atema September 15, 2020 nü Ministry of Health and Family Welfare, Government of India den Memorandum of Understanding

(MoU) nung sign sütep.

District Hospital Mon nung Government Medical College ya Nagaland nung medical college tanabuba asütsü.

Iba sentong nung Chief Minister Neiphiu Rio, Health & Family Welfare Minister S Pangnyu Phom, MP Lok Sabha Tokheho Yephthomi, Deputy CM Y Patton, Agriculture, Co-operation Minister G. Kaito Aye, Planning & Co-ordination, Land Revenue, Parliamentary Affairs Minister Neiba Kronu aser Transport, Civil Aviation & Railways, Land Resources Minister P Paiwang Konyak nungertem adentsü.

CNCCI-i 'Bharat Vyapar Bandh' nung shilem agitsü tuyur

Dimapur, February 26 (TYO): February 26, 2021 nü Confederation of All India Traders (CAIT)-i Bharat Vyapar Bandh ayongba nung Confederation of Nagaland Chamber of Commerce and Industry (CNCCI)-ia shilem agitsü.

India nung Goods and Service Tax (GST) inyakyim tenzükba ajanga shishilembartemi timtem ajurur. Iba jagi linük nung shishilembartemi Centre dang GST inyakyim zübazüba inyaksüsa yanglushiag ta takhangba agüja Bharat Vyapar Bandh ayongzüker.

Iba mokdang ya shishilembabaren atema dang lir aser tanga maparen nungbo mekongshitsü. Anungji nübortemi koda masüba timtem aremzüksü mepishir, ta CNCCI-i tanü sangdong ka nung metetdaksüogo.

CNCCI-isa District Chamber of Commerce and Industry (DCCI) temi Feburary 26, 2021 anepdang 6:00 ako nungi nikongdang 4:00 ako tashi pei pei district nung Bharat Vyapar Bandh amongtsü tetuyuba agütsüogo.

Manipur nung NSCN (I-M) den ceasefire mali: CM Biren Singh

Guwahati, February 23 (Agencies): NSCN (I-M)-ibo ceasefire nung Naga nung aliba tesem ajak dena lir ta ashir saka Manipur nungbo parnok den ceasefire mali ta chief minister N Biren Singh-i Hombarnü ashi.

12 buba Manipur Legislative Assembly indang session tembangba anogo nung MLA Alfred Kanngam Arthur-i asüngdangba langzüdang CM Biren-i iba ya metetdaksü.

Manipur nung ceasefire alitsü atema tebilemba kecha mali, ta paisa ashi.

"Tang tagidak Naga yimjung olemtep ya tebilemtsü tulu

rongnung ka lir aser iba tensa den liyonga arudang nübortemi kanga timtemogo" ta Biren Singh-isa metetdaksü.

"Manipur sorkari Naga yimjung olemtep ya telemteba tajung ka agia tembangdaksünür" ta paisa ashi.

"Onoki nübortem tanginüba metettsü atema civil society dena, sendaktepa alir ajak den asüngdangteptsü aser sorkar iba atema inyaksü" ta Chief Minister-isa ashi.

Taoba mapang Manipur sorkari Centre sorkar dang Manipur nung Naga telungpur telok indang teseptem atema osang tejangja meshiogo.

Union Finance Minister dang Trans Nagaland Highway atema teyari meshi



February 23, 2021 nü New Delhi nung Nagaland PDA sorkar nungi teshimtet telok kati Union Finance Minister Nirmala Sitharaman den ajurutepdang agiba noksa angur.

Dimapur, February 23 (TYO): February 23, 2021 nü Nagaland PDA sorkar nungi teshimtet telok kati New Delhi nung Union Finance Minister Nirmala Sitharaman den ajurutepdang aser iba senden nung kanga tongti süa jembiba onükji Trans Nagaland Highway yanglutsüba indang liasü.

BJP National spokesperson aser IT&C, Sc & Tech, & NRE Advisor Mmhonlumo Kikon lenisüba kübok iba teshimtet telok nung Nagaland state BJP President aser Higher Education & Tribal Affairs Minister Temjen Imna Along, Housing & Mechanical Minister Tongpang Ozukum, Horticulture, Border Affairs Advisor Mhathung Yanthan aser TE & Election Advisor Medo Yokha nungertem dena lir.

Union Finance Minister Sitharaman-i Union Budget

tajung benokba atema parnoki la nem tenüngsang agütsüba den Nagaland nung terenlok mapa inyaksü atema 'special allocation' atema mepishi.

Iba mapang Advisor Mmhonlumo Kikon-i Union Finance Minister dang Nagaland nung gari lenmangtem atema aser talisa Trans Nagaland Highway yanglutsü atema sen balaka agütsütsü mepishi.

Iba Highway ajanga Nagaland nung Foot Hills ajak sendakteper aser district aika sendakteper, ta paisa metetdaksü.

Minister Imna Along-ia Trans Nagaland Highway indang nenshia jembi aser National Education Policy nung North East State temi nüngdakba onüktem benoktsü mepishia liasü.

Minister Mhathung-i Nagaland nung aluyimer telok indang onük benoka jembi aser

Sitharaman-i iba atema akokba tashi yariteptsü ta nangzük.

Senden nungsa Minister Tongpang-ia Externally Aided Project (EAP) kübok Dimapur district nung International Exhibition and Convention Center ka yanglutsü atema tebilemba lemsatop.

Tongpang-isa Union Finance Minister den housing department-i State plan aser negotiated Loan kübok tang teinyakdak mapatongtem indang osang lemsatop aser item mapa tembanga inyaksü atema sen crore 400 shi nüngdaker ta ashi.

Nagaland sorkar nungi teshimtet teloki ashiba onük ajak angaba sülen FM Nirmala Sitharaman-i state renloktsü atema Centre sorkari akokba tashi yaritsü ta nangzük.

Parnokisa Nirmala Sitharaman dang Hornbill Festival nung adentsü atema jaok.

Karbi telungpur 1000 den timba temai adok

Guwahati, February 23 (Agencies): Assam nung Karbi telungpur telok 5 nungi züngsem 1000 den timba tanü Guwahati nung temai adokogo.

Mongulbarnü Guwahati nung aliba Srimanta Sankardev Kalakhetra nung sentong ka nung telungpurtemi Assam Chief Minister Sarbananda Sonowal

tsüngdang temai adok.

Iba sentong nung CM Sonowal den Karbi Anglong Autonomous District Council (KAADC) CEM-Tuliram Ronghang, Assam Police DG Bhaskar Jyoti Mahanta aser tongti ketdangsürtem aika aden. Tanü temai adoka bendanga agütsürtemji Karbi Anglong nungi PDCK, KNLF, KPLT, KLF aser

UPLA nungi züngsemtem liasü.

Telungpur teloktemisa sorkar den ceasefire aliba osang metetdaksüogo.

"Sendaktepa alirtem tsüngda yimten tsütsü mangatettep aliba onüktem angatetteptsü atema onoki ceasefire alitsü telemteba agi" ta PDCK Chairman JK Lijang-i ashi.

March nungi arishi küm 50 ser temapur nem Covid vaccine agütsütsü

New Delhi, February 23 (Agencies): Centre-i state o Union Territory ajak dang Covid-19 vaccine agütsüba maparen tuluba inyaksü tetuyuba agütsüogo.

Arishi küm 50 ser temapur nem vaccine agütsütsü atema Centre-i healthcare workers nem tang vaccine tagütsüdak maparen tuluba inyaksü ashi.

Union health secretary Rajesh

Bhushan-i State aser Union Territory nung Chief Secretary tem dangi shidi ka züluba nung vaccine agütsüba staff tem dang hopta shia anogo pezünü agütsütsü atema metetdaksü.

Rajesh Bhushan-isa March 1, 2021 nungi temang nung timtem aliba taintem nem Covid vaccine agütsütsü atema mozü kitem dang vaccination campaigns ulushia inyaksü metetdaksü.

Hombar (February 22) tashi nung India nung coronavirus puteter nisung crore 1.10 tema ajangogo. Yashi nisung 14,199 dak COVID-19 aliba putet, ta Union Health Ministry-i metetdaksüogo.

India nung nisung 1,10,05,850 dak COVID-19 putetogo aser nisung 1,56,385 süogo. Ajisüaka, taneptsü angubaji 97.22% lir.

Kekhriesilie Rio nem tenüngsang agütsüba sentong agi



Directorate of Youth Resources & Sports (YRS), Kohima nung February 23, 2021 nü Kekhriesilie Rio nem akhum tetushi agüja sentong ka agidang Er. Zale Neikha-i Kekhriesilie Rio nem sempet agütsüba noksa nung angur.

Dimapur, Tsüklai/February 23 (TYO): Tawa World Jumping Championship 2020 (South Zone) nung Category A nung takok anguba asoshi Kekhriesilie Rio nem tenüngsang agütsüba sentong ka Directorate of Youth Resources & Sports (YRS), Kohima nung February 23, 2021 nü agia liasü.

Iba sentong nung arua adener pela agizükba o jembiba mapang Kekhriesilie Rio-i takok anguba indang Commissioner & Secretary, YRS, Alun Hansing ajanga metetdaksü aser pa ya International Equestrian Federation ranking nung jenjang tanabuba lir aser India nung rongnung iba ama jenjang tongtetba ya pa mezüngbuba alitsü, ta ashi.

Kekhriesilie Rio-i jenjang balala nung takok anguba atema Advisor, YRS, Er. Zale Neikha-i tenüngsang agütsüba mapang tali meranga inyaka state aser linük nem tenüng tajung tali bener a rutsütsü ajungshia liasü.

Nagaland nung tang tashi Olympian ana dang lir - Dr. T. Ao aser Chekhrovolü, anungji Olympics nung shilem agitsü

nükjidong ayutsüla, ta pai ayongzük.

Advisor, Sericulture, Excise and Minority Affairs, Zhaleo Rio, shiba Equestrian Association Nagaland indang tir aser Kekhriesilie Rio tebu lir, paia Kekhriesilie Rio-i takok anguba ajanga state nung Equestrian (kor rongdong nung mener asemtepba asaya ka) ajungkettsü imlar, ta ashi.

Naga nungertem saisapong nung tsütsü sempet lir, saka sapang shidak mangur aser national jenjang nunga Naga nung lanur saisapongertem teyari peria mangur, anungji tarutsü nungbo saisapongertem tali temabai ajungkettsü imlar, ta pai ashi.

State nung Equestrian kisung asünung, tali meranga inyaksü ajungmeso, ta Kekhriesilie Rio-i ashi.

Iba asaya nung lanurtem tali ajungmesotsü aser iba den külemi state aser linük nem konang nungsang tali bener arutsütsü imla atar, ta pai ashi.

Pai takok anguba asoshi Tsüngrem, par kibong, Equestrian Society Nagaland,

state sorkar aser Department of Youth Resources & Sports nem tenüngsang agütsü.

Pa ya Asian Games 2022 trial nung shilem agitsü, koba Germany nung agitsü lir, aser pai tarutsü nunga jenjang tajung ka alangtsü imlaba lemsatep.

Kekhriesilie Rio-i Junior National Equestrian Championship (Endurance) (40-45 Km) 2014-15, Dibrugah nunga shilem agia Individual Category nung tasembuba jenjang ngutet; Junior National Equestrian Championship (Show Jumping) 2018, Kolkata nung mezüngbuba jenjang (National Champion - Individual) ngutet aser FEI World Show Jumping Challenge (Category A) 2020, Bengaluru nunga shilem agia World No. 2 aser Asia aser India nung No. 1 jenjang tongtet, National Equestrian Championship (Senior), Delhi 2021 nunga shilem agia Pussiance Jumping nung temaba jenjang ngutet aser Asian Equestrian Federation Junior/Young Jumping Challenge 2019 nunga Individual Category nung tanabuba jenjang nguteta liasü.

C-Edge College nung International Mother Language Day amung



C-Edge College, Dimapur nung International Mother Language Day amungba mapang kin balala nungi kaketshirtemi Mao tetsü-tebou ken ka atenba mapang tangokba noksa nung angur.

Dimapur, Tsüklai/February 23 (TYO): C-Edge College Dimapur indang GK Auditorium nung February 22, 2021 nü "Fostering multilingualism for inclusion in education and society" omen nung ajemdaker International Mother Language Day munga liasü.

Iba sentong ya BA VI Semester nung azünger kaketshir Limugha Zhimo menden sür agi aser BBA VI Semester nungi Evangelical Union tir D Esther Sonar-i

sentong tenzüka sarasadem.

Iba sentong nung onük jembir Duvolu Rhakho Assistant Professor, Department Of Political Science ajanga oshi balala koda tongtipang, ta asüba indang jembia liasü.

Tanü putui pei tetsü oshi angatetsü aser angazüktsü kanga tongtipang lir, anungji pei oshi mesamadaksütsüla aser dangar oshia akhumtsübuttsüla aser pei ayak wazüka ayutsüla, ta lai ashi.

Maneni shisaliok aser

loktiliba nung oshi balala jembiba aser angazükba ajanga tajangzük angubatem indanga Rhakho-i sentong nung lemsatepa liasü.

BA VI Semester nung English Department nungi kaketshirtemi ken ka aten aser BA II Semester nung azünger Department of English nungi Sapuna aser Sotsula nati Varied oshi nung sangro azünger.

BA VI Semester nungi Soun Lam-i tepela ankep o jembia iba sentong tembang liasü.

NSCN/GPRN (Reformation) ajanga Sekrenyi benjong salem lemsatep

Dimapur, Tsüklai/February 23 (TYO): NSCN/GPRN (Reformation) ajanga Angami Naga nung den Sekrenyi benjong salem lemsatepa liasü.

'Sekrenyi' ya Angami Naga kin atema benjong tongtipang ka lir, koba Angami nung ita 'Kezei' (February 25) nung ajurur aser iba yagi asüngtetba aser benjongtepa ken tentepba temaitsü sayur.

Iba benjong ya anogo ter tashi amunger. Yimtsüng rangben nung temang aser

tanüla asüngtetba tasen kumshitsü aser temeshi akumtsü nükjidong nung aser telungjem lidaksütsü aser tanurtem aiür-asangur akumba temaitsü iba benjong ya amunger.

Iba benjong ajanga Naga nungertem aser talisa Angami nungertem dangi tesunep aser telungjem maneni lidakjang aser yimjiyimjung südakjang, ta MIP (Ministry of Information & Publicity) NSCN/GPRN (Reformation) sangdong ka ajanga ashi.

Jalukie nung ki ka mitsü kuma rongdok



Sumziura 'B' Block, Jalukie nung Fire Personnel temi mi remsepa mapang tangokba noksa ka yangi angur.

Dimapur, Tsüklai/February 23 (TYO): Sumziura 'B' Block, Jalukie nung February 22, 2021 nikongdang 4:48 ako nung kitsük-kirong lendong adoka lir ta osang aruba sülen Fire Station Jalukie nungi Fire & Emergency Services team ka mi remseptsü oa liasü.

Mibenertem hadir tabensa bener oa iba mi remseptsü meranga liasü. Iba lendong nung süng agi yangluba ki ka den

yangji aliba osettsüset sen lakh 1.50 jenjang rongdoka liasü.

Mibenertem mapang shidak nung oa mi remsepa ajanga temeket nung aliba ki nung mi kaoloka aoba nungi nokdangteta liasü.

Iba mi ya electrical short circuit nungi tenzüka südi, ta temolung melema lir, aser iba lendong nung asü-amar shinga meliasü. Mibener tem ya Duty Commander F/M Seikhajang Kuki-i anir oa liasü.

Terenlok aser yimjiyimjung atema telungjem nungdaker: MLA Keneizhakho

Dimapur, Tsüklai/February 23 (TYO): Jotsoma nung aliba Tholo kidong aser Khonoma nung aliba Merhü kidong tsünga temba-tinua aruba temaitsü nüngshilong ka Tholoma Tsiepfhe nung February 23, 2021 nü 8 Western Angami Assembly Constituency nungi MLA Keneizhakho Nakhro ajanga sayaja liasü.

Jotsoma yimtsüng nung Tholo kidong nung Nakhro, Nagi aser Peseyie lir aser Khonoma yimtsüng nung Merhü kidong nung Lievüse, Gwizan aser Meyase lir.

Akhi mapang nungi kin ana tsünga ya tsükchitepa aru, saka densa melenshia aoba aser nungdakba agi kin ana tsünga tembar yimtep, ta MLA,

Keneizhakho-i ashi. Terenlok aser yimjiyimjung atema amalitep aser tesendaktep tali nungdaker, ta pai ashi.

Iba sentong nung Merhü kidong nungi tebu-teti Iralu-i kin ana tsünga atalokba otsü lemsatep aser lanu putu dang tesendaktem tajungba aser tashi taitba yanglutsü ayongzüka liasü.

Tesüiba mapang tsükchitepa liaka yimjung aser telungjem nung alitsü ya takoktsü lir ta kidong ana ya ajanga tatishitsü sayur, ta Rügolie Nakhro-ia sentong nung ashi.

Iba nüngshilong yagi tarutsü putu nunga kidong ana tsünga tesendaktep tali takhangba akumtsü amanger, ta Megorzo Chase-isa ashi.

Manipur CMBiren Singh-i Captain SM Rangnamei nem tenüngsang agütsü



(Abelen nungi) Yaküm Galwan Valley nung Indian Army captain Captain SM Rangnamei-i People's Liberation Army (PLA) sepaitem den raratepba angur. Mongulbarnü Manipur Chief Minister N Biren Singh-i Captain SM Rangnamei nem tenüngsang agütsü dang agiba noksa angur.

Imphal, February 23 (Agencies): Mongulbarnü Manipur Chief Minister N Biren Singh-i Captain Soiba Maningba Rangnamei nem tenüngsang agütsü.

Yaküm Galwan Valley nung People's Liberation Army (PLA) sepaitem den tasü itta raraba atema Captain Soiba Maningba Rangnamei nem tetushi agütsü.

Mongulbarnep Imphal nung CM indang official residence nung N Biren Singh-i pa nem tenüngsang agütsü.

16 Bihar Regiment nungi Captain SM Rangnamei ya Manipur kübok Senapati district nungi lir.

"Senapati, Manipur nungi Captain Soiba Maningba Rangnamei den ajurutepba ya konang ka lir. Galwan nung

Chinese PLA anema pai tasü itta raraogo. Linük kümzüka ayutsü atema pa ama sepaitem dang pelar aser tenüngsang agütsür" ta Biren Singh-i metetdaksü.

"Manipur state-i teti lanurtem dang armed forces nung adentsü aser Linük kümzüka ayutsü atema inyakba nung shilem agütsü ayongzüka arur" ta CM Biren Singh-isa metetdaksü.

Assam sorkari sen onsara apuba sentsüh memenokmatsü: AJP

Guwahati, February 23 (Agencies): Assam Jatiya Parishad (AJP)-i state sorkar dang 2016 nungi 2021 tashi Assam nung rongsenkettsüng jenjang indang white paper ka meshiogo.

"BJP-i aniba state sorkari tarutsü atema rongsenkettsüng tia kanga mejungi renema lir," ta AJP general secretary Jagadish Bhuyan-i ashi.

"Tashimait sorkar kati tesüiba küm pezü ser tasadang tashi state rongsenkettsüng tia kanga mejungi küm daksüogo aser parnoki maneni sen apur" ta pai ashi.

"State sorkari tang tashi nung Rs 46,000 crore apuogo aser taruba küm pungu tashi state-i sen tetemlok Rs 41,000 crore menoktsü" ta Bhuyan-i metetdaksü.

"Sen apubaji sen arutsüba scheme tem nung amshitsüla aser yamaji asü nung dang

tarutsü nung state azükarutsü. Ajisüaka, tang aliba Assam state sorkari ibaji mebilemer. Kobi melii Assam ket nung sen malitsü. Loan tali agiba ajanga tia tamajung ajurutsü aser sorkari ano tesüiba ita ishika tsüngda Rs 1000 crore tema apuogo" ta paisa ashi.

"Sorkar kati khuretem koktettsü atema sen apura, tarutsü anogotem state ket nung sen mali akümtsü" ta Bhuyan-isa shisem.

Centre nung BJP sorkari Assam nungi 'special state status' agienba sülen Assam-i taoba küm ishika tsüngda Rs 7000 crore nungi Rs 9000 crore shi akoksaogo, ta paisa metetdaksü.

"State sorkari taoba küm 4 tashi tejakleni aoer ta parnok tenüngsanga jembiyonga arur, saka parnoki loan agiba dak alaka kecha meinyak" ta Bhuyan-i aitsü.

"Taoba ita ka tsüngda Prime Minister Narendra Modi aser Union home minister Amit Shah nati asembenben Assam semdangogo. Ano tenati maneni semdangtsü sentongtem atonga lir. Tzümettsüng timtem ajurudang Assam nungertemi kasa prime minister aser home minister dang nungi teyari angutsü imla. Iba mapang tubo tenati Assam atema inyaksütsü mapang maliasü, saka tangbo ita ka nung asembenben semdangi arur. AJP nüngtugu akümba ajanga BJP aoksar iba mapa inyaker" ta paisa metetdaksü.

"Taoba election nung par party-i nangzükbatem sorkari meinyaktet nung, pai tiyazü tenangzükbatem agia semdangpet mesemdangtsüla ta onoki prime minister dang shinür. Pai tiyazü nangzükbatem timba küma aotsü" ta AJP lennir Bhuyan-isa ashi.

Mawlai nung CRPF tesepe amenoktsü anema lungkakait

Shillong, February 23 (Agencies): Meghalaya sorkari Arts & Culture department indang ali nung Central Reserve Police Force (CRPF) tesepe ka yanglutsü sentong atongba atema nisungtemi lungkakaiter.

Mongulbarnü Meghalaya yimtiba Shillong nung Seng Samla Mawlai Pyllun (SSMP)-i anir Mawlai nung alirtemi lungkakait.

Guwahati-Shillong lenmang nung aliba Mawlai petrol pump lenjem nung nisung noklang aika adenshir lungkakait.

SSMP-i lungkakaitba ajanga tanü state sorkari land survey agütsü aliba sentong athi.

"Sorkari Mawlai Nongkwar nung aliba kimung indang tasazük meteta lir, iba nung arts & culture department-i amphitheatre ka yangluogo" ta SSMP president, Samuel Biam-i ashi.

"Arts & culture department-

i tanga kiojentem yanglunüra, DPRs mesüra architectural design renema inyaktettsü. Ajisüaka, sorkari parnok sasa land survey aginür aser ibaji miim tebilemba kar atema asütsü ta nisungtemi bilemer" ta Biam-isa ashi.

Sorkari district administration ajanga iba tesem nung land survey masütsü lemtetba ajanga Mawlai nung alirtem mashioktsütettsü, ta paisa shisem.

"Onoki yangi dang metembangtsü. SSMP teshimtet telok ka den Mawlai Town Dorbar-i sorkar den iba onük lemsateptsü aser arts & culture department indang kimung nung CRPF indang tesepe masü saka tanga terenlok mapa inyakdaksütsü" ta Biam-isa metetdaksü.

Külen, Meghalaya sorkaribo Mawlai Nongkwar nung CRPF tesepe lapoktsü sentong kecha mali ta metetdaksüogo.



Manipur kübok Churachandpur district nung Manipur police-i brown sugar factory ka makdokogo. Iba factory ya Tuibong Subdivision nung T. Bethlehem Village nung liasü. State sorkari 'War on Drugs Campaign' tenzüka nung iba ya shilem ka liasü ta Churachandpur Superintendent of Police Amrita Sinha-i ashi. Iba factory nung nisung asem apuba den Rs 1 lakh, ammonium chloride, di-ammonium phosphate, lime aser opium seret 5.3 apu. (Imphal, February 23)

Assam CM-i ULFA-I dang Quippo mapa inyakterem chioktsü ayongzü

Guwahati, February 23 (Agencies): Assam chief minister Sarbananda Sonowal-i Mongulbarnü Paresh Baruah-i aniba United Liberation Front of Assam (ULFA) dang Quippo nung mapa inyaker ana chioktsü atema ayongzüko.

"Assam sorkar olemtep atema molunga lir aser onük ajak olemtep ajanga angatetteptsü. Anungji, sorkari ULFA-I den olemteptsü renema lir ta ni ashir" ta Sonowal-i metetdaksü.

Arunachal Pradesh kübok Changlang nung ULFA (I)-i NSCN (K) den yaritepa totzü company nung mapa inyaker 2 apu aser tena chioktsü atema Rs 20 crore meshir.

Deobarnü ULFA-I tanishir Paresh Baruah-i nisung ana

tepsettsü lemtetba sota atar ta osang metetdakja liasü.

Deobar nikongdang Gauhati Press Club secretary Sanjay Ray den telephone ajanga jembidang ULFA (I) commander-in-chief Paresh Baruah-i "civil society aser media-i mepishiba agizüka onoki tena metepsetti atatsü lemtetogo" ta ashi.

"Media nung shilem kati extreme punishment aibelena meyipzü aser ULFA (I) o NSCN-i iba onük atema olemtep molunga lir" ta Baruah-isa ashi.

Yaküm December 21 nü Changlang district nung Quippo company nung mapa inyakterem- radio operator Ram Kumar aser drilling superintendent Pranab Kumar Gogoi na pur ao.



Meghalaya Chief minister Conrad K Sangma-i Mongulbarnü East Garo hills nung gari lenmang ana- Nengmandalgre nungi Daribokre, aser Nengmandalgre-Cherangre nungi Sisobibra yanglutsü lung azüngtsü dang agiba noksa angur. Gari lenmang ana ya Rs 83.15 crores endoka Pradhan Mantri Gram Sadak Yojana (PMGSY) kübok yanglutsü. Tanü CM Conrad-isa Nengmandalgre Primary Health Centre (PHC) lapoktsü. (Williamnagar, February 23)



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 24, 2021

ASENOKI INYAKTSÜBA MAPATEM

Tang ya Nagaland nung lisopur o lisopur masüba purtem na bendangtsü asoshi ken o jembiba mapang ka lir. Atangji, tamalen Nagaland government-i latetba özüng nunga Nagaland state akümba anogo, December 1, 1963 tashi nung arua alirtem mesüra mezüng adokba Nagaland electoral roll nung alir nisungtem aser par chirnurtem dang Nagaland senso asütsü ta temeten agüja lir. Iba denji ano külen Naga nung masüba purtembo temelaba (Inner Line Permit) magii Naga lima telongi aittsü makok ta 1873 küm British yimli mapang lateta yutsüba özüng tang tashi amshia arur. Anungji, Nagaland nung liso masüba purtembo Nagaland nung senso küma melitetsü, iba jagi Dimapur dak alaka Nagaland nung Naga nung masüba purtem kimong ali alia senso küma melitetter aser ILP nung anogo ishika melaa aliba anogotem dak alaka talila amongtsü memelar. Aji oda, asenoki züzüa toktsüba agidang ashi, Nagaland nung tsümartem aruagi ita ta masü saka kümsa küm dokan lapoka shishilembaa amongba ya özüngi memelaba mapa ka lir, kechiyong ILP ya Nagaland nung küm junga dokan lapoka yur amongtsü atema agütsüba temelaba ka masü. Ano, Dimapur nung dokan amener, taxi aser auto rickshaw anishir noklang nung 90 shilembo tsümartem dang anguba ya asenoki Dimapur yabo asen lima masü saka tsümar lima amato yutsüba ajanga atalokba lir. Nagaland ajunga nung ILP amshiaka Dimapur nungbo mamshi, anungji Dimapur yabo taruner ajak aruagi senso küma amongba tesem ka amato aküm. Atangji, tangbo state government-i Dimapur nung dena ILP amshitsü özüng laleta lir saka mapa küma mamshitetter, kechiyong asenoki ano junga mangatet. Iba jagi anogo shia bendangertem Dimapur-i mapa bushia arur aser parnok inyaktsüba mapabo melamelaa angur. Aji oda, parnok kar Naga nung lu nung, kar Naga nung kiojen yangludak inyaktsü, kar taxi aser kar autorickshaw anishitsü aser tanüngba ajakji second hand süoshi aser ngashi ayokba mapa nungi tenzüker pei pei yari dokan tapu balala lapokyonga orr mendagi. Ibayongji, taoba küm ishika tsüngda Dimapur kanga longsua kümogo. Atangji, iba jagi nütsüng arener aser yimti tuluba küma aoer, kechiyong yimti tuluba küma renloktsü asoshi nütsüng nüngdaker. Ajisüaka, Nagaland nung tanga tesemtemji khien yutsür, Dimapur nung nütsüng renlokba aser mapa inyakertemji reprangdangra, asenok lisopurtembo mapa nunga aser nütsüng yongsük nunga tajemba akümer saka tangar bendangertemang teimba akümer. Ibaji asenok asoshi shisabolutsüka lir, anungji iba tebilemtsü ya akoktsü atema parnoki inyakba mapatemji kechisa asenok asoshi takoktsü ali, itemjibo asenoki inyaktsüla. Tanübo joko asenoki tsümartem ya özüng latettsüba kijaibo moudaktsütettsü aser tashiyim amshiaa maridoktetsü, anungji asen lima nungi parnok odaktsütsüba parnok nem mapa magütsütsüla. Atangji, tsümartem ya teimbaka Nagaland-i aruba ya teti alitsü asoshi aru masü saka ayangi aruba purtem lir, anungji parnok teinyaktsü kecha makai kümra, parnoksasa oa adoktsü. Tanü asenok dokan lapoka mentettsüpurtem aser taxi aser autorickshaw anishitetsü purtemi item mapaji meinyakner, anungji itemji tsümartem nem inyakdaktsür asenok mapa mangu bushia senzür. Joko, bangdak nung alirtemia telok kari longkak aita akang matai, dokan lapoka shishilembatsü aser taxi aser autorickshaw anitsüba temelaba yabo tsümartem nem magütsütsüla aser Naga nung tenüng nunga tsümartem inyaktsü memelatsüla. Tatsüba agi, Dimapur Railway station nung lapoka akaba dokan aser hotel ajak to Naga nung tenüng nung lir saka Naga nung shinga mena mangur. Joko, item amaji Naga nung tenüng nung Nagaland nung tsümartem nem shishilembadaktsüba aser mapa inyakdaktsüba sobaliba ya anenadoktsüla aser Nagaland nung Naga nung lanurtemi bendangertem inyaka aliba wadangtem nungji parnok melena nokdaktsüla. Iba jagi dang Naga nung lanurtem peisasa inyakba nungi aruba rongsen agi pei perir anüngtsü. Iba sentongji asenoki tangsa tenzüksüla.

OLEMSABANG

AO OSHI SAYUYIM

~ P. Renthly Jamir

- Lanurtem dang Ao oshi tetezü ratet tabensaba nung sayutsü nükla nung rangloker item meyi tep ojang (Opposite word) tetezü ana/asem aliba Tulu/Tila, Aluti/Nünü, Tajung/tamajung, Tawa/Pentong yamala ojang ishika zülur. Mabensaba kar lira metongshia züngdaktsünür.
1. Achiasüng - Atangashi = Temoatsü aren aliba. Yimren maka anüngapongba.
 2. Angkwa - Aluruzüker = Jepdak tang agütsütsü. Tatem aluruzüker agitsü.
 3. Anki - Pokpapoklem = Temulung tulu. Tasü mait.
 4. Asen - Aon = Tasen, asenalu, asenchi. Tejen aontsük.
 5. Atsüanem - angaka ao = Haihaura aka, lenchi otep, aremzü. Tekong merang.
 6. Azüngmeyaka - Waluatena = Rongjenseta. Longsolongbena
 7. Bangrongti - Chiminomi = Kin tulu, nübener. Kin tila, kijaluja nübu.
 8. Hahapela - Temaküm - Tepela jakden, ajak den kasa. Mejembinü, tejak septsü.
 9. Impur - Mesomalir = Yimkümer, yokyashinü akar. Kecha makar.
 10. Jelipong - Menumayang = Tangar dang tama apuso. Tesüpur, tangar sülen apuso.
 11. Jerapera - Aialem = Tokoka ajak menep. Aiatsüng, aialar.
 12. Kaaita - Anüngaponga = Takar, peria lir. Makamait toshia/timtema alir.
 13. Ketaasen - Meketmesüng = Meimtep, meima benshi. Mesenmetua benshi, sempa.
 14. Kilenazükyu - Lembumazük = Moameja azükaarua alir. Mazükmaru atener.
 15. Kirep - Tongjala = Kibong nung alir ajak. Nübu kaka
 16. Kirka - Puluapulua = Ajak kasa tareni. Payimi mesüi pulutepa mashimashi.
 17. Kirtsüng - Azünglak = Yim anasa ongpanglu. Azünglu/azünglen oa.
 18. Kitiluti - Tinomano = Onsara tulu. Tila/mejimenü tamshi malang.
 19. Kongwataka - Kuscümongtaka - Onsara tulu. Alimela ila, ku den kasa.
 20. Kotak - Molumi = Tali shizüka jangratema. Okrongseta/timtema tali meshizük alir.
 21. Koti - Raji = Ninang/meja telok tesepe tulu. Telok tila zünga raji.
 22. Kümli tasü - Mitlong = Nisung tajung taremsük. Ainapong aket, mit tejokjok.
 23. Kwimai - Temeki = Onsara aika, jenti, züngermezüngma. Ishika, peria masü.
 24. Lemalema - Pongaponga = Tanemtanemi. Mashimashi jokajoka, tareni masü.
 25. Lepja - Mesükmenang = Tongmelang. Jangnemkonem/tali benja.
 26. Lumongla - Tedemtila = Tulutsüjang, ozü tulula. Tilatsüjang/tilala.
 27. Lungtem - Amzü = Onsara taret, temulung tulu. Tepongba, tamakitsü oset.
 28. Mainshilung - Jangjamajang = Masetshiba/züngzünga noktakba. Teret mait.
 29. Maipula - Sümenüla = Yakta achila. Tsükchila/menur achila.
 30. Mangti - Jangnem = Temang tulu. Tilala, onsara tila, temok tila.
 31. Meranjang - Nokpuan = An tila tsüjang. An tulutsüjang (Tetsür tilala/tulula)
 32. Merükmeju - Lidiputi = Ajak nung temerük. Tesempatsü menener dang alir, memerük.
 33. Metetsümonga - Tenhamaha = Asaa meteta inyak. Memeteti aibelena inyaksem.
 34. Metilep - Tzüyima = Shi temolong. Tachi majung mesola metzü poyar.
 35. Meyakmeken - Tashionshi = Apayua achi amshi. Lalushiponga ali.
 36. Meyati - Tepok = Kibong aika külemi alu/arem mali. Arem agi mekütbang.
 37. Milepalep - Lazülako = Rüpozü, tsüngtenratener. Mapayim mayim yimpazür.
 38. Moazüa - Alaashia = Chimayima nung taluposa. Anüngaponga/timtema.
 39. Mokotet - Temchiji = Mulungtet/lemtet agi. Atapisü/nongnanga kazü.
 40. Mulungso - Yishiyili = Teinyaknü/maa maka. Tezüya/teti nongnanger.
 41. Naklo - Atak = Tushi/tenüng asang. Sensatsü/tenüng asen, sempaseta atak.
 42. Nokchi - Nokzü = Timlen. Mashilen (Nokchi nokzü tajung tamajung bendanga)
 43. Nanglanangshi - Azüngteptsü = Talitapong aika. Tejang kata manüng tilatem.
 44. Nokyu ajung - Metchi = Moamechia takok angu. Temoatsü mali, tamakok tenchi.
 45. Noyanomak - Pokmapongji = Yimdong kazür tanur. Tantsür tambur.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iraq nung küm aika rara ajanga Khristan nütsüng kanga ajemogo



Iraq kübok Bartalla jila nungi Khristan, Saad Hormuz'er kibong noksa nung angur. 2014 küm IS kiralongrartemi Bartalla amakba mapang nung par kibong Al-Qosh jilai jena oa ita asem tashi Tenla ki ka nung jenoka aliba sülen para ki ka nung ali. Tang parnok Jordan linük nung refugees ama lidar aser maneni Canada-i oa alitsü tebilemba lir.

February 23, 2021: Iraq nung küm 20 dak tema rara balala ajanga iba linük nung Khristan nütsüng kanga ajema kümogo; US-i aniba teloktep sepaitem Iraq-i aruba mapang Khristan kar jenshi, Jihad kiralongrartemi amakba mapang Khristan aika jenshi aser IS kiralongrartemi amakba mapang Khristantem aika jenshia liasü.

Akhiidang Iraq nung Khristantem Nineveh province nung mezüing amenoka aliba sülen linük yimtiba, Bhagdad nung aika oa ali, iba sülen küm 20 dak tema linük nung rara balala ajanga Khristan million 1 dak tema jenshiogo.

Iraqi Chaldea nunger Khristan Sally Fawzi-i küm 10 tejaklen Iraq toktsür ajen aser tang la US nung lidar. "Ni arrshi küm 24 asüidang ni rara asembo ajangshir liasü," ta lai ashi.

Iraq nung Khristan karbo anasa aliba autonomous Kurdish region nung jenoka lir aser parnok aika kidanger linük Jordan-i oa alitsü, iba sülen tesüsa linük balala nung alitsü tebilemba lir.

Khristan aikati par linüki tanaben oa alitsü tebilemba liasü saka aika teimla samaogo. Ajisüaka taruba ita Pope Francis-i Iraq semdangba sülenbo linük aikati Iraq nung Khristantem pusemtsü aser linük nung tesünep alitsü, ta aikati imlar.

Iraq nung Khristantem rongnung Chaldea nunger, Armenia Khristantem aser Protestant Khristan densema denominations balala aika lir.

2003 küm taoba mapang tashi tali amshia yimsüsür, Saddam Hussein atsüngdokba mapang tashi nung nütsüng million 25 aliba linük nung Khristan nütsüng million 1.5 (shilem 6) shi liasü, iba sülen

rara balala ajanga Khristan nütsüng kanga ajema kümogo. Tanübo Iraq nung Khristan nütsüng 400,000 (lakh 4) dang lir, saka Muslim nungerbo million 40 dak tema lir.

Iraq toktsür aoer Khristan million 1 nungjagi tesadang shi United States nung jenokogo aser tangartemji Canada, Australia, Norway aser Europe linüktem nung jenoka lidar.

Arrshi küm 40 Khristan, Rana Said-i, 2007 küm Mosul yimti nung la tetsü tanutsü aser kinüngbu na US sepaitemi khaset, iba sülenbo la kinüngbu, Ammar al-Kass tenati Iraq toktsür Australia-i oa alir, ta metetdaksü.

Parnok Australia-i aoba sülen küm ka lir Islamic State kiralongrar teloki Mosul yimti agi. Iba mapang nungji IS kiralongrartemi Mosul nung Virgin Mary Arogo Tenla ki raksaja liasü.

Iraq nung IS-i Bartalla yimti-a agia liasü saka küm asem sülen Iraq sepaitemi kiralongrartem maakdok, iba sülen Khristantemi pei kidangi tanaben ao saka ki ajak rongdoktsür liasü.

Jordan linük nung Khristan refugee, Saad Hormuz-i, Pope Francis-i Iraq semdangba mapang nung pai alima linüktem dang Iraq nungi Khristan refugees yariang ta mepishitsü imlar, ta ashi.

"Iraq-i tanaben aotsüjibo tamakoktsü," ta pai ashi.

Sweden nung Iraq nunger Khristan 140,000 dak tema lir; Mosul yimti nungi jena oa Sweden nung jenoka alir Raghid Benna-i, "Yangi Chaldea nunger Khristan aika lir, anungji ni bendanglen alir amai mebilemer," ta ashi.

2008 küm nungi US nung jenoka alir arrshi küm 38, Sally Fawzi-i, "2007 küm Kirkuk

nung Khristan asübayong ozü kinünger ana tsüngsetba osang angzükbä sülen ozü kibongi kanga mangyima liasü. Tanübo kü meyong ki ka lir, ozü kibong lir, ni mapa inyaker aser ozü kinünger kibong ka kasa yimti nungsa alir, ajisüaka ni Bhagdad nung ozü ki aser medemertem kanga menungrar," ta ashi.

Mapang ka nungbo Iraq yimtiba, Baghdad kija nunga Khristan nütsüng 750,000 tashi liasü saka tangbo shilem 90 ajemer shilem 10 dang kümogo. Parnok rongnung putir Younan al-Farid densema lir. Younan'er adianubo jena oor Canada nung lidar aser pa aianu-a US nung jenoka lir.

Tang Iraq nung Tenla ki shilem 30 shi shibangogo aser tekülem sentong nung adenertem ishika dang kümogo, ta putiri metetdaksü.

Küm 20 tashi Iraq nung azü tokshiba aser bomb lendong kanga liasü saka 2017 küm tatembanglen IS kiralongrartem maakdokba sülenbo linük nung tensa süngjemogo, ajisüaka linük nung Khristan densema minorities-i timtem maneni ajurur.

Putir Younan-i, "Khristantemi maneni linük toktsür aoer. Khristantemi sen rizünger aser sen peria rizüngba sülenbo linük toktsür aoer," ta metetdaksü.

Iraq nung coronavirus wara den külemi totzü jenjang ajemba ajanga linük nung rongsenkettsüng dak sendakba timtem tulu lir, ibayongji mapa inyakterem nem itasen menoa magütsür mesüra itasen katir agütsür.

Tang linük nung anüngzüka aliba Khristantem atema tayongzükbä jenti aliba mapang ka nung Pope Francis-i Iraq semdangtsü.

ANOGO ABEN TSÜNGREM DEN

Onok dang sarasademtsü sayuang
Mathi 12: 46-50

Tai inyakba lokti tanidak. Anitet 23:2

Iba tekong yagi asenok teinyaktsü akaba meimchir lir ta sayur. Meimchir taküm ka ama asenok tazüngla dang malir. Na aser ni lokti liba teyangluba ka ama telok ka mesüra ka nung dena lir: kibong, arogo, telok, kin, meimchir kibong. Iba yagi Kechiba asenok telok anidaktsütsüla aji sayur.

Telok sülen anidakbaji teti temenen ta Tsüngremi mashir. Saka Pai ashi, tai nung telok anidakbaji temenen. Tia maka teloki loktiji anidaktsü tuyur.

Kodang tamajung nung asenoki telok anidakdir kija tai inyakba aibelen bilemba ama mebilemer. Aikati yamaji inyaker anungji shidaka ama bilemer, tai asüyonga kecha masü ta bilemer. Tsüngremi yamaji mebilemer, aser iba kuli asoshi Tsüngrem tenüng asangtsüla. Kechiaser asenok kecha shiaji teinyaktsü lir, pai kija shia asoshi Yisu yok. Ibayongji Baptiba aser Kibuba Benjung nung Pa O nung kija tejangja tekümtet aser tatok agütsüba tejangja sayu. Iba jagi Pai kija shia nem tekümtet tamang agütsü.

Asenok kija shia teinyaktsü lir.

Tsüngrem, onok taküm mapa agizüktsü aser nangzüktsü yariang, "Ni Yisuji kü Kibur ta amanger." Pa tenüng nung. Amen.

Kaduna State nung Tenla ki ka rongoktsü

February 23, 2021: Amongnü (February 21) Nigeria nung Kaduna State kübok Kikwari yimdak telungpurtemi Holy Family Catholic Arogo Tenla ki ka den Khristan kibong ana meyong ki rongdoktsüogo, ta International Christian Concern (ICC) osang ajanga metetdaksü.

Ministry of Internal Security and Home Affairs nung Comisioner, Samuel Aruwan-i, prangpong amer telok ka aruba mapang nungji yimdaklirtem jenshia liasü, ta metetdaksü.

"Yim anasa telungpurtem aliba osang angazükba sülen yimdaklirtem ajen. Telungpurtemji yim tonga aruba sülen Tenla ki den ki ana rongdoktsü," ta Commissioner-i metetdaksü.

Governor El-Rufai-i iba tatalokba aitsüba den külemi Khristantem nem security agütsütsü nangzük. Taoba mapang nunga Governor-i Khristantem nem security agütsütsü ta aiben nangzüka liasü, saka nangzükbaji dang ashi mapabo meinyaker.

Iba yim amakbaji koba telokiar mejangja, ajisüaka Kaduna State nung Fulani kiralongrar aser Boko Haram densema Ismalic kiralongrar telok balalai mapang shia Khristantem amaker.

February 14 nüa Nigeria nung Muslim Fulani kiralongrartemi Khristan pezü khaset. February 14 aonung

8:00 ako meta Bassa County kübok Kwall District nung Fulani teloki Evangelical Church Winning All (ECWA) nung züngsem pezü khaset, ta Irigwe Development Association (IDA) otongdar, David Mali-i metetdaksü.

"Bassa County kübok Kwall District nung aliba yimtsüng ana nung Khristan pezü khasetba atema Irigwe nungeri mangyimer," ta Mali-i sangdong ka ajanga metetdaksü.


Khristantemji arrshi küm 29, Ezekiel Maja, Emmanuel Agaba (39), Moses Daburu (26) aser Kefas Bulus David (31) nunger lir ta jangjaogo, ta pai metetdaksü.

Fulani telokisa Zirshe yimdak ki aika rongdoktsü aser naira sen million aika jenjang tsük rongdoktsüogo, ta David Mali-isa metetdaksü.

Irigwe Khristantem ya yimjung meimba nüburtem lir, anungji onoki mang mayangtsü, ajisüaka onok teburchi masü ama mangatettsüla, ta paisa metetdaksü.

February 7, 2021 nüa Fulani teloki Kaduna State kübok Khristan yimtsüng ana-Kishosho aser Zirshe na maaka liasü, aser iba mapang nungji Arogo nung putir, Danlami Sunday densema Khristan 5 tepseta liasü.

February 17 nüa Niger State nung kiralongrartemi tebur indang boarding high school ka amakdang Khristan ka tepset aser nisung 42 puer ogo.

OLONG PAITEP # 5734**TIPIEN**

1. O jembitsü tashi - 8
 5. Süngjang tapu ka - 5
 7. Tekanük nung enokba - 5
 8. Teka amtep - 5
 12. Tzüc asendak - 5
 14. Tsünpang tema aliba - 5
 15. Ken atenba yimya - 5
 16. Asangur - 8

LANGTSÜNGLEN

1. Tepok telung nung shilem ka - 7
 2. Tamajung aküm - 5
 3. Chi den külemi achiba - 3
 4. Meimchir alimai aruba - 3
 6. Laishiba nung ayong ka - 4
 9. Tarutsü nükla - 7
 10. Tamendakdak/Nükjidong - 4
 11. Tenük-telen mejungi aküm - 5
 13. Terok nungi adokba - 3
 14. Meimchir telemsa - 3

OLONG PAITEP # 5733 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
 9. Ajizük, 10. Ojala, 11. Semer,
 13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
 5. Mitsüktsü, 6. Azübenshi, 8. Lah,
 9. Jangkuk, 12. Akok, 14. Nashi,
 16. Sür.

**WARAKLA O ALOKBA NA TIA :**

Warakla : Tambu, na ya kechi inyaker?

Alokba : Ni kaküt ka azüngerä.

Warakla : Süra kechia ta yamai ajeper?

Alokba : Kaküt tatempang part ya tejashitsüka anga.

Warakla : Kechi kaküt ka azüngerajito?

Alokba : Kü indang bank pass book ajaii.

Warakla : Oh Alokba!

Lilir : WhatsApp

TANÜBO NAI LANGZÜANG

Q. Doha nung World Olympic Qualifiers aser Asian Olympic Qualifiers asayamung _____ nung asayatsü.

- A. March 14th B. March 18th C. Both A and B D. March 13th
 ===== (Taruba adok nung onoki langzüksü)

YASHI ADOK TELANGZÜBA : 2009

NAI-A YA METETTER MA?**INDIA NUNG 'NATIONAL INSTITUTE RANKING FRAMEWORK' (NIRF) AJANGA ASADANGTETBA MEDICAL COLLEGE TAJUNG TEM: 2021**

1. All India Institute of Medical Sciences (AIIMS), New Delhi
2. Post Graduate Institute of Medical Education and Research, Chandigarh
3. Christian Medical College, Vellore
4. National Institute of Mental Health & Neuro Sciences, Bangalore
5. Sanjay Gandhi Postgraduate Institute of Medical Sciences, Lucknow
6. Banaras Hindu University, Varanasi
7. Amrita Institute of Medical Sciences & Research, Kochi
8. Jawaharlal Institute of Post Graduate Medical Education & Research (JIPMER), Puducherry
9. Kasturba Medical College, Manipal
10. King George's Medical University, Lucknow
11. Institute of Liver and Biliary Sciences, New Delhi
12. Madras Medical College and Government General Hospital, Chennai
13. Sri Ramachandra Institute of Higher Education And Research, Chennai
14. St. John's Medical College, Bengaluru
15. Aligarh Muslim University
16. Vardhman Mahavir Medical College and Safdarjung Hospital, New Delhi
17. Maulana Azad Medical College, Delhi
18. Christian Medical College, Ludhiana
19. University College of Medical Sciences, Delhi
20. JSS Medical College, Mysore

(Maneni asüng adok nung...)

SUDOKU # 5776

7		9	4	6		3			9	2	8	3	5	7	1	6	4
	6		5			9	8		6	7	1	9	4	8	2	3	5
	5	3					1	4	3	4	5	6	1	2	7	9	8
4					7	8			2	8	3	7	6	4	5	1	9
	7		2	1	6				4	6	7	5	9	1	8	2	3
3	2			9			7		1	5	9	8	2	3	4	7	6
6	9	7	1			4	3	5	7	9	2	4	8	6	3	5	1
8				4	5	7	9		8	1	6	2	3	5	9	4	7
		1		3	9	2			5	3	4	1	7	9	6	8	2

TELANGZÜBA # 5775**OJANG LUTEP # 5322**

- IRSHIKENOSHI :
- MBIJESA :
- URY :
- PANTEG :
- GNUN :
- MELTEI :
- EMEMASR :
- GROO :
- AIT :
- TOOKTNGLSÜ :

OJANG LUTEP TELANGZÜBA # 5321

SHIA METETBA SEMPETTEM MASÜBA NUNG MESÜI SHITAK NUNG AMSHITSÜ MERANGANG

TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?

Olong 20 shi nung February 26, 2021 tashi nung iba telangzuba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsütsü.



Pune nung Covid-19 tashidak poteter tali akümba ajanga Pune administration-i tenokdangba agütsüba sülen kaketshir aser mapa intakertem pei yimti bushia aoba noksa nung angur.

Maoists aser state na tsüngda sensaksemtsü atema Peace panel ka tentet

Raipur, Tsüklai/February 23 (Agencies): Activists, osangbener aser social workers temi Chhattisgarh nung Maoists temi timtem agütsüba tesemtem nung yimjung bener arutsü asoshi maoist aser sorkar na tsüngda sensaksemtü atema yimjung committee ka tentetogo. Concerned Citizens' Committee of Chhattisgarh (4Cs) nung züngsem 11 lir aser parnoki anir state aser Maoists na tsüngda sensak asemtsü

asera kasa mapang nung telok anaprongla sabang kati anir arutsü. Taoba Union minister Arvind Netam, taoba SC/ST Commission mendenbuba Nandkumar Sai, Sarv Adivasi Samaj lenir B Rawte, Bastar nung Communist Party of India (CPI) lenir Manish Kunjam, Sarv Adiwasi Samaj executive tir B.S Rawte, osangbener Diwakar Muktibodh, Kamal Shukla, social worker Virendra Pandey,

Indu Girish Pankaj, aser RD Rao nunger committee nung densema lir. Peace activist Shubhranshu Chaudhary, iba committee convenor asütsü shimogo, ta osang ka ajanga Mongolbarnü metetdaksü. "Onoki Andhra nung 3Cs (Concerned Citizens' Committee) model reprangzükogo, shirnoki telok anaprongla sabang kati anir arutetogo saka takok mongutet. (Maneni tapak 9 nung...)

Delhi police-i Jammu nungi aluyimer lenir 2 apu

Jammu/New Delhi, Tsüklai/February 23 (Agencies): Delhi police-i Jammu nungi tongtibang aluyimer lenir ka densema nisung ana puogo. Tena ya January 26 nü aluyimertemi tractor nung mener longkak aiba mapang lendong atalokba nung densema aliba atema apu, ta ketdangsertemi Mongolbarnü ashi. Jammu yimti kübok Chatha tesem nung alir, Jammu and Kashmir United Kisan Front mendenbuba Mohinder Singh (45) aser Gole Gujral, Jammu nung alir Mandeep Singh (23) nati lendong atalokba nung shilem agi aser lokti rongmesortem rongnung tongtiser shilem agi, ta Delhi police-i ashi. Tena ya Hombar anonung Delhi police Crime Branch-i

apu aser ken o ashishitsü atema linük yimtibai anir ao. Tenaprongla Jammu and Kashmir police teyari nung apu, ta police-isa ashi. "Osang ajanga ashiba agi, Red Fort nung mepetmesü adokaktsür rongnung tena densema liasü aser tenapronglai tongti shilem agi," ta Delhi police additional PRO Anil Mittal-i ashi. January 26 nü aluyimba ozüng agintsü akhangtsü atema Aluyimba lokti tenteti ayongzükba tractor parade mapang longkak aitertem aser police tsüngda mangatettep tulu adok. Longkak aitertem aika parnok indang tractor tem nung mener Red Fort tonga aru aser parnok rongnung kari tamangba

yimsü wako atsüketa liasü. Ajisüaka Mohinder Singh'er kinungertemi ashiba agi, pai kecha aibelena mali aser pa tangsa tang chioktsü khangogo. "Pa indang phone switched off masü tsüngda pai kü dang, pa Senior Superintendent of Police (Jammu)-i aja aser pa Gandhi Nagar police station semdangtsü ta ashi. Osang agitepba sülen pa police-i apu aser Delhi-i anirogo ta angazük," ta Singh kinungtsüi osangbenertem dang ashi. Lai ashiba agi, lendong atalokba mapang la kinungbo Red Fort nung masü saka Delhi arrtsü nung liasü. "SSP den ajuruteptsü pa kija ao, kechiyong pai aibelena mali asünung kecha tsübua mali," ta lai ashi.



Bengaluru nung taküm tution fees shilem 70 dang agitsü atema private school tem nem sorkari teruyuba agüsüba sülen Karnataka Private school Management, Teaching and non-teaching staff Coordination Committee (KPMTCC) züngsemtemi placards amer longkak aitba noksa nung angur.

Odisha Congress MLA temi cycle nung mener assembly-i ao

Bhubaneswar, Tsüklai/February 23 (Agencies): Totzü jenjang tali akümba anema aser Chhattisgarh aser Bengal nung ama petrol aser diesel nung saru ajemshitsütsü khang Odisha nung Mongolbarnü Congress MLA temi bicycle nung mener state assembly-i ao. Malkangiri kübok Kalimela nung totzü jenjang timtiba lir, kong litre ka nung sen 97.45 agi yokdar. Bhubaneswar nunga totzü liter ka nung sen 91.64 agi yokdar. Jeypore MLA Tara Bahinipati aser Khariar MLA Adhiraj Panigrahi nati Congress Bhawan nungi state assembly-i cycle nung mener ao. Kasaji Jatni MLA Suresh Routray-ia bicycle ka nung mener ao. "Chhattisgarh aser West Bengal nung totzü jenjang ajemogo. Odisha nung kechiba Naveen Patnaik-i jenjang majemshidaktsütettsü? Pai pa indang juli nungi taa agütsür asü? petrol aser diesel nung jenjang ajungketba ajanga nüburtem kangshiba CM aser PM Modi dang sayutsü atema onoki iba yimya nung longkak aiter. Onoki Centre aser state

dang state nung totzü jenjang ajemtsütsü akhanger," ta Bahinipati-i ashi. Bahinipati-i ashiba agi, totzü jenjang ajungketba ya Central aser Odisha naprongla mapa lir. "Sorkar anaprongla dak meimchir atema temeim mali. Ato Kilonser Narendra Modi-i, pai taoba mapang nangzükba 'Acche Din' meleni 'Bure Din' agütsür. Petrol aser diesel jenjang anogoshia atur. State aser Centre-i tangsa tang saru ajemja nüburtem nem anisüngzük agütsütsüla," ta Bahinipati-i ashi. Kasa mapang nung Congress MLA Adhiraj Panigrahi-i, "totzü jenjang atuba ajanga nisung ajak dak kongshiogo. Ni chief minister Naveen Patnaik densema BJP aser BJD züngsemtem dang nüburtem tekangshi angatettsü atema cycles amshitsü mepeshir," ta ashi. Yashi Congress lenir Rahul Gandhi-i tweet ka ajanga nüburtem dang crude oil jenjang timba masü saka tajemba kümogo ta metetdaksü aser Modi sorkari parnok medemertem juli angati agi süngtsütsü atema nüburtem juli azüngtettsür, ta ashi.



Lakha sidhana (tabelen) shiba Republic Day nü Delhi nung aluyimertem longkak aitba mapang mepetmesü adokba nung densema liasü pa sota yua lir.

S Jaishankar-i Mauritius nung chancery building ka semzüktsü

Port Louis, Tsüklai/February 23 (Agencies): External affairs minister S Jaishankar-i, Mongolbarnü Mauritius nung Indian High Commission nung chancery building tasen ka semzüktsüogo aser iba den India-i teyari agüja yangluba housing units 950 dak tema asadanga liasü. Jaishankar, Deobar anonung Maldives nungi Mauritius-i ao. Pa tang India Ocean nung kidanger linük ana semdangba mapang lir. Jaishankar-i, Ebene kübok High Commission of India nung Chancery-cum-Residence building tasen ka semzüktsü. Ki tasen semzüktsüba sentong nung Mauritius Ato Kilonser Pravind Jugnauth aser foreign minister Alan Ganoo na densema liasü, ta Mauritius nung Indian High Commission sangdong ka ajanga

metetdaksü. "Tatishitsü aketba tesendaktep. DPM & housing minister Louis Steven Obeegadoo den Dagotiere Social Housing Project asadangogo. India-i teyari agüja yangluba Housing Units 956 nung yakta nüburtem alitsüba osang angazüka pelar. India nemadangdaksüba mapa inyakertem ajak dang kanga pelar," ta Jaishankar-i tweet asü. Mauritius ya Indian Ocean temeket nung India atema maritime kidanger tongtibang ka lir aser Ato Kilonser indang nükla 'SAGAR' (Security and Growth for All in the Region) nung tongtibang shilem ka lir. Mauritius nung India nungi jakzüker nütsünyongsük shilem 70 shi lir. Parnok tetsü tebutem British nunger yimsüsüba mapang iba tesemi aayanger ama yoka liasü.

US nung COVID-19 agi asür nisung 500,000 jungogo

Washington, Tsüklai/February 23 (Agencies): United States nung coronavirus agi menepa alir nisung 500,000 dak tema süogo, ta Johns Hopkins University ajanga ashir, aser ibai alima nung nisung timtiba asüba linük alitsü.

California state nung iba tashidak agi nisung mezüing asüba osang sangdonger küm ka shi lir Himbarnü iba tetsübutsi alizüing ya atonger.

"Tanü asenok asoshi temolung shirangtsü alizüing atonger - 500,071 asü," ta US Tir Joe Biden-i Hombar nikongdang White House nung mapang tatsüka mokremba sülen ashi, kong asürtem tenüing nung temu milen noklang aika tsükloka liasü.

"World War I, World War II aser Vietnam War meyoktepba dang nungi talila iba tashidak agi küm ka nung America nunger asü. Alima nung iba virus agi nisung asüba danga linük dang nungi kanga agi timba," ta Biden-i ashi.

"Asenoki America nung nisung yamai asüba züingshidang asenoki nisung ajak aser parnok takum aliba bilemteter. Parnok ya asenoki meteta liasü, mesüra asenoki meteta alir ama bilemer."

Biden administration ajanga mozü agütsüba maparen tenzüka iba virus prokshiba azüoktsü mechi nübürtem nem tenokdangba tali agütsüba ajanga tawa COVID-19 tashidak menatepa aoba tajemba akumer.

Saka cases ajema akumba mapang America nungertemi



COVID-19 tashidak agi America nunger nisung asür 500,000 ajungba nem akum agüja Washington nung aliba White House nung sentong ka agidang Tir Joe Biden, first lady Jill Biden, Vice President Kamala Harris aser Doug Emhoff nungertemi khen mokremer aliba noksa nung angur.

kanga kumdanga alitsü nungdaker, kechiaser herd immunity ajungtsü asoshi US nung mozü peria agia mali, ta linük nung menatepba tashidak tsütsü takotet nisung, Dr Anthony Fauci-i Deobarnü ashi.

"1918 küm saksü-pokshi wara sülen küm 100 shi asenoki iba ama majurudangi lia aru. Nisung asüba züingdangra ibai kanga tesümgangtsü lir, koba tamamangtsüka saka shidakba lir," ta Fauci-i NBC indang Meet the Press sentong nung ashi.

"Tang tashi anogoshi tashidak menatepa aoba ya kangasa sashia lir... Asenok lendong nungi pilaogo ta bilemtsü asoshi menatepa aoba tsütsü kangasa ajema akumtsü

nungdaker."

Coronavirus dak sendakba nung nisung 500,000 junga asüba nungtem nung Republican aser Democratic party nungi US legislator temi Mongulbarnü Congress nung mapang tatsüka mokrema alitsü.

Biden-ia federal building aser mitkartem aliba tesem ajunga nung February 26 nü anü mai tashi US nisan tiyongtsü ka tashi atsüketa alitsü totuyuba agütsü.

Tiri tashidak wara azüoktsü asoshi pa tir Donald Trump dang nungi mera tesashiba agitsü nangzüka lir, kechiaser Trump-i iba virus süoki ia magizük.

Pai tir menden nung mener mezüing anogo 100 tsüingta coronavirus mozü doses million

100 agütsütsü nangzük aser Congress nung COVID-19 relief bill sen trillion \$1.9 agizükdaksü, koba agi kanga mejungi kongshir aliba kibongtem yaritsü, ta pai ashi.

Taoba administration ajanga tashidak wara asoshi mera agibatem reprangshia Biden administration ajanga mera tabu balala agitsü nungdaker, ta White House National Security Adviser Jake Sullivan-i Deobarnü ashi.

Iba tashidak wara asoshi World Health Organization-i anir ochishia bushisüingdang ka US-i aginer, ta Sullivan-i ashi.

WHO-i iba virus poktetba

bushisüingdangba mapang China-i data ajunga agütsütsü memolung ta osangtem angazükba sülen Biden administration ajanga Beijing aitsü.

Deobarnü tashinung US-i par linük tesem ajungalen coronavirus mozü million 75.2 dang tera agi timba lema agütsüogo, ta US Centers for Disease Control and Prevention (CDC) ajanga ashir.

Nisung million 18.8 dak tema mozü dose ana-na agiogo aser nisung million 43.6 shi kasa mozü dose ka-ka agiogo.

Biden-i pa indang administration amenoker anogo 100 ajungdang America nunger million 100 nem iba mozü agütsütsü nükjidong tongtettsü meranga inyaker amai lir, ta Washington DC nungi osangbener kati ashi.

Iba mozü agütsüba mapang timtem kar ajurur saka United States nung iba mozü agiba ajanga nisung asüba aser menatepba kanga ajema kumogo, anungji teimla lir, ta osangbeneri ashi.

Coronavirus agi kanga sashia kongshidak California nung mozü million tenet dak tema agütsüogo, ta Governor Gavin Newsom-i Honibarnü ashi.

California nung COVID-19 positive rate ya shilem 3.1 lir, koba hopta ka tejakdang shilem 9.9 liasü aser mozüki nung anepalur aser intensive care nung alirtema shilem 39 nungi shilem 35 kumogo, ta Newsom-i Hokulbarnü ashi.

Malaysia nung okadak kati Myanmar nungertem meyoki atatsü tuyu

Kuala Lumpur, Tsüklai/February 23 (Agencies): Myanmar nunger migrants 1,200 pei linüki meyipa yoktsü atema sentong yanglur aliba Malaysia nung okadak kati sota atatsü atema Mongolbarnü tetuyuba agütsüogo. Human rights telok anati Myanmar-i meyipa yoktsüpurtem rongnung refugee, tejenokda bushirtem aser tanurtem dena lir ta shia ken o ano ken asadangshitsü atema benokba angadangtsü atema sentong thinena atar.

Amnesty International Malaysia aser Asylum Access Malaysia-i ken o benoka okadak ajanga tetuyuba agütsüba mapang nungbo migrant tem naval base kati anir oadoker liasü, kong parnok kidangi anir aotsü atema Myanmar military rong asem ataa liasü.

"Okadak ajanga tetuyuba agütsüba sorkari akhümtsübutsi aser tanü bendanger 1,200 rongnung ka danga meyoktsü atema jenjang tapet agitsüla," ta Amnesty International Malaysia's director, Katrina Jorene Maliamauv

Amnesty-i, parnok temepeshiba okadak Bodhbarnü

angadangtsü, ta ashi aser sorkar dang migrants tem pei kidangi meyipa yoktsü sentong yanglur aliba tanaben asadangshitsü atema mepeshi, kechiyong February 1 nü military-i sorkar atsüngtokba sülen Myanmar nung human rights dak sendakba nung aibelen aika menaba mapang ka lir, ta ashi

Amnesty-isa, sorkar dang U.N. High Commissioner for Refugees nem migrants 1,200 aser immigration detention center ajak asadangtsü atema temelaba agütsütsü mepeshia asüingdangogo, koba Malaysia sorkari 2019 küm August ita nungi tenokdangba agüja lir.

Malaysian immigration department-i taoba mapang ashiba agi, migrants tem rongnung UNHCR cardholder mesera Muslim Rohingya refugee tem ka danga densema mali. Item migrant tem ya kuli kakat tejangja malirtem, visa nung temelaba agütsü aliba dak alia mungzükertem aser social visit pass nung aibelenertem dang lir, ta ashi.

Ajisüaka telok ana yagi ken o benokba nung ashiba agi, migrant tem rongnung UNHCR nung züingoksema alir asem

aser tanur 17 densema lir shirnok tsürapur kabosa Malaysia nung telidak lir. UNHCR-ia, Myanmar-i yoktsüpurtem rongnung nisung trok parnok den züingoksema lir, ta ashi.

Kasa mapang nung Malaysia nunger lawmaker aser senator 27-ia Ato Kilonser Muhyiddin Yassin dangi shiti ka ajanga Deobarnü iba sentong sota atatsü atema mepeshia asüingdangogo.

Congo nung Italian Ambassador aser tangar ana tepset

Goma, Tsüklai/February 23 (Agencies): Hombarnü Congo anütoklen United Nations convoy ka amakba sülen Democratic Republic of Congo dangi Italy ambassador aser tangar ana tepsetogo, ta Italy foreign ministry aser park authorities-i metetdaksü.

Regional capital Goma nungi km ishika pilar Kanyamahoro jila anasa 10:15 akoshi nung convoy maka liasü, ta Virunga National Park-i Reuters dang ashi.

Italian ambassador, Luca Attanasio aser pa den külemi

senzua aliba military policeman ka tepset, ta Italian foreign ministry-i ashi.

Park-i taoba mapang convoy nung nisung ana tepset aser ambassador yirur lir ta metetdaksü. Lendong nung asür tasembuba ya gari anir ka liasü, ta diplomatic source balala ajanga metetdaksü.

Shirnoki iba convoy amak iba indang osang tang tashi mejangja aser kasa mapang nung telok kati danga convoy amakba nangzüka mali.

(Maneni tapak 9 nung...)



Mandalay, Myanmar nung Thet Naing Win indang tasümgang süngten bener aoba mapang nübürtemi temeyong asem agi sayua akum agütsüba noksa nung angur. Mitkartemi tashiyom amshia Myanmar sorkar atsüngdokba anela longkak aitba mapang Thet Naing Win ya Myanmar sepaitemi khaseta liasü.

Razeba Town nung Literary Day mungogo

Kohima, Tsüklai/February 23, 2021 (TYO): Beti Bachao Beti Padhao tawabangba kübok, G. H. S Razeba Town, Phek District nung Mongolbarnü District Administration & District Level Centre for Women - Mahila Shakti Kendra (BBBP), Phek-i Literary Day sentong ayonga agiogo. "Beti Bachao Beti Padhao "/> "Naotume na Lukhelu-u, Hasu pfo naotume na - mudapio" omen nung ajemdaker iba sentong ayongzüik, kong Poetry Writing Competition agia liasü, ta sangdong ka ajanga metetdaksü.

Tanurtem teshisadangba ulushitsütsü aser ibaji ajanga parnoki sangro (poetry) zülutsü sempet tajungba nung amshitetsü nükjidong nung iba tetoktepba ayongzüiktsü.

N. Bhavani Sri IAS (C) , Phek & Nodal Officer BBBP, Phek-i, timtema alir tetsürtem nungittsü aser class nung külem züngatsürtem bendanga amshiba inyakyim nokdangtsü asoshi kaketshirtem ajungshi.

Tetsür o tebur na tebendang kecha meli kasa temeden agütsüba inyakyim atema nokdaksü aser lenla kar nung metokmeperiba lira itemji metongshitsütsü asoshi pei sasa jung junga shisadangtsüla, ta lai ajungshia liasü.

Tetsür aser tebur naprongla nem temeden kasa agütsüba maparentem maongka kisung nung dang merangloktsüla saka ajaki iba atema khuret abentsüla, ta nodal officer-i ashi. Iba sentong nung Smti. Neingutsii Sami, Graduate Teacher, GHS, Razeba-i telok pela agizük. Sentong tenzüka, Vizo Pohen, Pastor Baptist Church-i sarasadem aser Kelengunuo Soho, EAC Razeba Town-i tepela anküp o jembi.

Sentong agiba sülen, 'recreational games' ayongzüik, kong tanurtem dang recreational inyakyim indang tongtumbangtem nung tesayuba agütsü aser iba ya ajanga temang nung yariba den tekolok renlokdsüba tem metetdakja liasü.

Sangro toktepa sentong nung shilem agir tanurtem nem sempet den temang nung teyari agütsüba chiyongtsü aser Gift hamper tem lema agütsü. Iba sentong nung Vilen Kapu, Women Welfare officer DLCW- Mahila Shakti Kendra menden liasü, ta kasa sangdong nung shia lir.

"Bhoot Police" September 10 nung sayatsü

Mumbai, Tsüklai/February 23, 2021 (Agencies): 'Bhoot Police' ta nüngja agütsüba horror-comedy film ka taküm September 10 nü sayatsü terenemba lir. Iba film nung Saif Ali Khan, Yami Gautam, Jacqueline Fernandez aser Arjun Kapoor nungeri tongti shilem agiba angutsü.

"SAIF - ARJUN indang #BHOOTPOLICE 10 SEPT 2021 nü sayatsü. Iba horror-comedy #BhootPolice nung #SaifAliKhan, #ArjunKapoor, #JacquelineFernandez aser #YamiGautam nungeri tongti shilem agir. Iba film ya Pavan Kirpalani-i direct süogo," ta Mongolbarnü twitter ajanga trade analyst Taran Adarsh-i lemsatep.

Bhoot Police project ya taoba küm (2020) November ita nungi tangok tenzüik aser February 5, 2021 nü film tangokba maparen tembangogo. Iba film ya tongtibang tesem talisa Himachal Pradesh, Mumbai aser Rajasthan indang Jaisalmer yimti nung tangoka liasü.

Ragini MMS aser Phobia

yanglusang Pavan Kirpalani-i iba horror-comedy film direct süogo. Taoba mapang Saif kinungtsü Kareena Kapoor Khan-i iba film indang poster den film takok ngua tangoktsü asoshi lemsatepogo. Coronavirus wara süngjema aoba asadangteta, Centre Sorkar ajanga film maparen tenzüikshitsü melaba sülen, November 2020 nungi iba film maparen tenzüik aser Himachal Pradesh nung tenem aliba tesem talisa Dalhousie aser Dharamshala nung film shilem kar tangokogo.

Maoists aser state na tsüngda sensaksemtsü... (Tapak 7 nungi...)

Onoki parnoki aibelen nungi angazüktsü merangdar. Committee nung 'adivasi' nunger ka danga densema maliba atema taitüsüa aika ajangshiogo," ta Chaudhary-i ashiba den committee ya telok ana tsüngda apular akümtsü.

Committee nung tetsür aikabo mali saka iba ya yakta melenshitsü, ta pai ashi.

Committee yakta senden amen tenzüiktsü aser state kübok mepetmesü nung aliba district tem nung district committee tem tentettsü.

Sarv Adivasi Samaj-i anir, taruba itatem nung committee-i lokti sentong balala ayongzüka agitsü telemtetba agiogo.

"2018 küm Congress manifesto nung ashiba agi, Naxalism anema jenjang tapet agitsü atema policy ka yanglutsü aser sensaksemtsü asoshi jenjang tapet agitsü. Tang yimsüsüa aliba sorkar dang iba indang lephsia ashitsü nüngdaker ta ni bilemer aser Indian constitution nung pro Adivasi laws benoktsü atema sensaksem ajanga keno bentettsüji par lokti atema tajungtiba asütsü ta Maoist lenirtemi angatettsüla," ta Chaudhary-i ashi.

Hombarnü senden tembangba sülen committee-i sangdongba osang ka nung, Chhattisgarh anüolentip len yimden yimsüsüba tsütsü mangatettep adoker aliba dak rangloker parnok inyaktsü, ta ashi.



Mumbai, Tsüklai/February 23, 2021: Mongolbarnü, Mumbai nung FX Electric Range sayaba mapang (abilen nungi) Malind Kapur, Senior Vice President, Marketing, Product Marketing, Channel & Business Development, Piaggio Vehicles, Diego Graffi, Chairman & MD Piaggio Vehicles Pvt. Ltd. aser Saju Nair, EVP and Head of Commercial Vehicle Business, Piaggio India Pvt Ltd nunger külemi tangokba noksa ka yangi angur.

Office Of The
Longpok Semchir Telongjem
HQ: Mokokchung
SANGDONGER

6th Buba Longpok Semchir Inti Mungdang Longkhüm yimtiba nung alidang lemteta renemba nung ajemdaker asen Longpok Semchir Tebou Tarensen kaket nung adoka zülua ayutsü asoshi yimtsüng ajak dangi office ajanga 14th March 2016 anogo nung osang yoker 9th April 2016 anogo tashi nung pei yimtsüng nungi pei kidong nung tatartem den külemi Village Council Chairman ajanga kuli sür ketdangpur ket tongjang ta sangdonger inyaka arudagi, saka yimtsüng kar nungi magütsü aliba ajanga tanü tashi iba kaket tembanga madokteti lir. Anungji shirnok yimtsüngisa magütsü lir, item yimtsüngtem nungi 31st May 2021 anogo tashi nung ketdangpur ket tongjang ta iba sangdong ajanga metetdaksür.

Ashiba anogo tashi nung ketdangpur ket metongtsüra ner yimtsüng tebou tarensen iba kaket nung madoktsüsa akümtsü. Anungji iba ya kanga tongtibang ta ajaki bilema temalen shia aliba anogo tashi nung agüjang. Osangtsüsang atema tongtepratepnüa lira teküboklen agüja aliba contact nos. ajanga asüngtangtep nung kanga ajungtsü.

Contact Nos. : (i) President : 9856514699 / 7005153826
(ii) Gen. Secy. : 8415826724 / 7005495698

Külem tenzüker

Sd/-
K.Nokmarenba
Tir
Longpok Semchir Telongjem

Sd/-
Imkongnungba Lkr
Tongti Zülur
Longpok Semchir Telongjem

LG W41, W41 Plus aser W41 Pro saya



New Delhi, Tsüklai/February 23, 2021 (Agencies): India nung LG-i company indang W-series smartphones lineup atema LG W41, LG W41 Plus aser LG W41 Pro bendenlokba sangdongogo.

Item smartphone ajunga nung 5,000mAh battery, quad rear cameras aser face unlock densema specifications kasa angutsü, saka RAM configuration aser storage option balala alitsü. LG W41 series ya LG W31 lineup den tatongtep alitsü, koba taoba küm sayaa liasü. Iba smartphone ya sentsü ana nung angutsü.

India nung vanilla LG W41 - 4GB + 64GB storage variant jenjang sen 13,490 aser LG W41 Plus - 4GB RAM den 128GB onboard storage jenjang sen 15,490 asütsü. LG W41 series ya official LG retailer tem ajanga Laser Blue aser Magic Blue sentsü nung angutsü.

Specifications tsütsü reprangdangra, LG W41 series - regular model, LG W41 Plus, aser LG W41 Pro nung 6.5-inch HD+ (720x1,600 pixels) HID Full Vision display den 20:9 aspect ratio aser selfie camera atema hole-punch cutout alitsü.

Iba phone nung octa-core MediaTek Helio G35 SoC - 2.3GHz inoka yanglutsüogo. Phone tesülen, rectangular module nung quad camera inokja lir, kong LED flash angutsü. Iba camera setup nung 48-megapixel primary camera, secondary 8-megapixel ultra-wide-angle camera, 2-megapixel depth sensor aser 5-megapixel macro shooter angutsü. Selfie atema, handset tejaklen 8-megapixel shooter dena lir.

Company-i ashiba agi, iba camera app nung mode talisa slow-motion, time-lapse video support, High Dynamic Range (HDR) aser twenty-live filters inokja lir. Tanga feature tsütsü reprangdangra, LG W41, LG W41 Plus, aser LG W41 Pro nung Bluetooth 5.0, GPS/ A-sen 14,490 alitsü. Top model LG W41 Pro nung 6GB RAM + 128GB storage angutsü aser iba jenjang sen 15,490 asütsü. LG W41 series ya official LG

Congo nung Italian... (Tapak 8 nungi...)

"Temulung zürepa Foreign Ministry-i tanü Goma nung Democratic Republic of Congo dangi Italian Ambassador Luca Attanasio aser Carabinieri nungi police ka asüba osang lemsateper," ta foreign ministry sangdong ka ajanga metetdaksü.

"Ambassador aser sepiasang na ya Democratic Republic of Congo nung United Nations Organisation Stabilisation Mission; MONUSCO convoy nung gari ka nung senzüa liasü," ta kasa sangdong ajanga metetdaksü.

Ministry website ajanga ashiba agi, Attanasio ya 2017 küm nungi Kinshasa mission nung Italy nungi tekolakba liasü aser pa 2019 küm ambassador kümdaksü.

Virunga tesem nung telungpur aika inyaksangshir, koba Rwanda aser Uganda den Congo indang arrtsü nung lir. Park rangers aiben maka arudar kong taoba ita nisung trok tashi tepsetba densema lir.

Cristiano teyari ajanga Juventus-i Crotone akok



Turin, Tsüklai/February 23, 2021: Allianz Stadium, Turin nung Hombarnü Juventus aser Crotone na tsünga Serie A asayaba mapang Cristiano Ronaldo-i juka tur pa kolak agi goal tanabuba idaktsüdang agiba noksa ka yangi angur. Juventus-i Crotone madak goal 3-1 agi takok angu.

Turin, Tsüklai/February 23, 2021 (Agencies): Hombarnü Serie A asayamung nung Cristiano Ronaldo-i goal ana idakja Juventus-i goal 3-0 agi table punglanglen alir Crotone club kokogo. Iba takok den Juventus pur table nung jenjang tasembubai tuogo.

Iba asaya nung Juve pur tera anüalema asaya tenzük, saka Alex Sandro indang cross ball ka Ronaldo-i agizüka minute 38buba nung Andrea Pirlo'er telok atema mezüing goal inoktsü.

Juventus pur goal kati tejakdang ser asaya aoba mapang, tatsüka dang lir halftime atongtsü lia Ronaldo-

isa pa kolak agi goal tanabuba tongokja goal 2 agi parnok Crotone tejakdang ser mezüing half tembang.

Goal ana tashi atonga idaktsüba ajanga tan Serie A league nung goal timtiba idaktsür alir asayar rongnung Portugal nung forward back asayasang Ronaldo kümogo. Tan Serie A asayamung nung Ronaldo-i goal 18 tashi idakja lir, koba Inter Milan nungi Romelu Lukaku dang goal kati tejakdang alitsü.

Tanabuba half nung arishi küm 36 tain Ronaldo-i hat-trick goal idaktsütsü maongka angu, saka külem team pur Weston McKennie-i maongka agia

Juventus atema minute 66buba nung goal tasembuba bendenloktsü. Serie A asayamung indang tan season nung Weston-i goal pezübuba idaktsür alitsü.

Football tetoktepba ajunga nung asaya pezü nungi mezüing takok den Juventus pur point 45 ngua, table nung jenjang trokbuba nungi tasembubai tuogo aser point 8 agi temaba jenjang nung alir telok Inter Milan tesülen alitsü.

Ano külen, Crotone pur asaya 23 nungi point 12 dang ngua table punglanglen lir, koba relegation zone nungi jenbotsü atema point 8 nüngdaker.

International cricket nungi Upul Tharanga anener

Colombo, Tsüklai/February 23, 2021 (Agencies): Mongolbarnü, Sri Lanka cricket team atema küm 15 tashi opener asayasang Upul Tharanga-i international cricket asaya nungi anenba sangdongogo. Küm 15 tashi Sri Lanka national team atema Cricket telemsa balala nung shilem agia arudang, pai mapang tatsüka captain inyakogo.

Arishi küm 36 tain Tharanga, shibai 2017 küm July nungi November tashi captain inyak, pai 2019 küm South Africa tour nung Sri Lanka national team atema pai tesüsa shilem agiogo.

"International Cricket asaya nungi anentsü atema ni telemtetba agiogo," ta Twitter sabang ajanga Tharanga-i lemsatsep.

International Cricket wadang nung ajemoka shilem agia arudang, Tharanga-i Sri Lanka atema Test asayamung 31 nung shilem agiogo. Iba mapang pai century' 3 aser 'fifty' 8 densema 21.89 indang average nung run 1754 yanglutet.

2005 December ita Ahmedabad nung Sri Lanka aser India tsünga Test series



asayadang team nungi pai Test asaya nung mezüing shilem agi aser 2017 küm Pallekele nung kasa team (India) den asayadang pa tatembangbuba Test nung shilem agiogo.

Tests asayamung dang nungibo, teka abilen batting asüsang Tharanga-i ODIs nung tajungba shilem agia aru. 2005 küm August ita West Indies aser Sri Lanka na asayadang Tharanga-i mezüing ODIs nung ajemoka asaya tenzük. Sri Lanka team den ODI asaya 235 nungi Tharanga-i 33.74 average nung run 6951 yanglu.

Tharanga-i ODI asaya nung century' 15 aser half century 37 yanglu lir, kong asaya ka nung pai run 174 (not out) yangluogo. Tharanga-isa Sri Lanka team atema T20Is 26 asayogo aser

pai innings ka nung run 47 densema run 407 yanglu lir.

International Cricket asaya nungi aneba osang sangdongba den külemi, Cricket asayar tajung ka akümtsü nungitba atema Tharanga-i pa den yariteper ajak dang pelaba lemsatsepogo.

"Shin o nung 'Tajung ajak tatembang kati arutsüla' ta shia aliba ama, küm 15 tashi kü dak aketba sempet tajungtiba amshia asaya arur sülen, ni International Cricket career toktsütsü asoshi mapang agi tonga aruogo ta bilemer. Ni asaya arudang tangar den tesendaktep tajung yanglu aser parnoki ni nungita yaria aruogo aser ni iba asaya toktsü yongjia ni kodanga item mapa tajung mamadoktsü. Kü dak teti temulung lemteta yaria aruba asoshi Sri Lanka Cricket danga pelaba metetdaktür. Iba den külemi, Cricket wadang tsütsü ni bilemba ama masayatetdang aser takok ngua shilem agiba ajunga nung kü den amalitepa aser nungitba atema temeim fans, medemertem aser kinungertem danga ni pelaba shisemer," ta Tharanga-i lemsatsep.

Vijay Hazare Trophy: Nagaland-i Mizoram kokogo

Dimapur, Tsüklai/February 23, 2021 (TYO): Tang asaya aliba Vijay Hazare Trophy asayamung nung, Mongolbarnü (23.02.2021) Nagaland aser Mizoram na tsünga asaya liasü. Iba asaya Nagaland-i run 29 agi Mizoram kokogo.

Toss koka, Nagaland team-i batting shim aser parnoki over 50 nung run 357 yanglu wicket 9 out asü.

Nagaland team nungi asayatem rongnung Stuart Binny-i run 80, Sedezhalie Rupreo-i run 65, Jonathan Rongsen-i run 62, Hokaito Zhimomi-i run 33, Chetan Bisti-i run 31 aser SS Mundhe-i run 30 yanglu liasü.

Mizoram nungi bowler Varte

Kima-i wicket 5 out sütsü. Kasa mapang, G. Lalbiakvela, Pratik Desai aser Bobby nungeri wicket ka ka agi.

Kasa asaya tanabuba shilem nung, Mizoram-i over 50 nung run 318 dang yanglutet aser parnok asayar 6 out süadok.

Mizoram nungi asayar rongnung Pratik Desai-i run 141, Taruwar Kohli-i run 108 aser KB Pawan-i run 40 * yanglu liasü.

Nagaland team nungi bowler Stuart Binny, Nagaho Chishi aser Khrievitso Kense nungeri wicket anana agi.

Nagaland team taruba asaya Assam den Brehostibar (25-02-2021) anepdang 9:00 ako nungi tenzüka asayatsü.

India tetsür hockey team Germany-i ogo

New Delhi, Tsüklai/February 23, 2021 (Agencies): Argentina Tour nung India tetsür team-i asaya tenet nung shilem agiba sülen, Rani-i aniba India tetsür Hockey Squad ya ano asaya pezü atema Mongolbarnü Germany-i ayamesoa ogo. Tokyo Olympic Games atema renemshiba shilem ama India tetsür team-i Germany tetsür team den asaya pezü nung tokteptsü.

Mongolbarnü, Bengaluru nungi asayar 18 aser support staff tenet densema India tetsür Hockey Squad ayamesoa ogo. Germany-i maodang team ya national coaching camp atema Sports Authority of India Centre nung munga liasü. Germany atongba sülen,

February 27, 2021 nü team-i world No.3 German team den asayatsü. Iba sülen February 28, 2021 nü team ana tsünga tanaben asayatsü.

Anogo ka anisüngzüker sülen March 2 aser March 4, 2021 nü tanünga asaya ana asayatsü renema lir.

Germany Tour atema India tetsür hockey squad nung, Goalkeepers: Savita (v-c) Rajani Etimarpur Defenders: Deep Grace Ekka, Gurjit Kaur, Udita Nisha Midfielders: Nikki Pradhan, Monika, Neha, Lilima Minz, Sushila Chanu Pukhrambam, Salima Tete, Navjot Kaur dena lir.

Forwards: Rani (captain) , Lalremsiami, Navneet Kaur, Rajwinder Kaur, Sharmila Devi alitsü.

Strandja Memorial Boxing: Deepak Kumar quarter-i iogo

New Delhi, Tsüklai/February 23, 2021 (Agencies): Sofia, Bulgaria nung 72buba Strandja Memorial Tournament boxing tetoktepba nung Asian silver-medal angusang Deepak Kumar (52kg)-i pa nem lemozütsüba asaya koka quarterfinals-i iogo.

Deepak, shibai 2019 India Open asayamung gold-medal angu, pai quarter final tongtettsü atema Kazakhstan nung Olzhas Bainiyazov madak 5-0 agi takok angu.

Hombarnü, kasa asayamung tetoktepba balala nung tebur rongnung Naveen Kumar (91kg) aser tetsür draw nung Jyoti (51kg) nati pei tata asaya kokogo.

Iba asaya nung Naveen-i 3-2 agi America nung Darius Fulghum tsükdaktsü aser Jyoti-ia 4-1 agi Ukraine tsür Tetiana Kob akok.

Ajisüaka, India boxing contingent nungi Shashi Chopra (60kg), Lalita (69kg) aser

Sakshi (57kg) nung mezüing bout nung tamakok ngua iba asayamung nungi tsükadokogo.

Shashi ya 0-5 agi Brazil nung Beatriz Ferreira-i tsükdaktsü. Ano külen, Lalita-a 0-5 agi Uzbekistan tsür Navabakhor Khamidova-i tsükdaktsü.

Külem India tsür Sakshi-i 1-4 agi America tsür Andrea Medina makok.

Tebur tetoktepba nung, Naveen Boora (69kg) aser Ankit Khatana (75kg) naprongla byes ajanga iba asayamung pre-quarterfinals-i iogo.

Strandja Memorial Tournament boxing nung France, Ireland, Kazakhstan, Russia, Sweden, Ukraine, United States of America aser Uzbekistan densema linük 30 nungi boxer temi shilem agidar.

Bulgaria nung tang asaya aliba asayamung atema India nungi tetsür 5 aser tebur 7 densema züngsem 12 team yokogo.

BILEMDANGANG

"Tejak tereprangtsü tajungji ajaki nükshir saka shisatsü tajungjibo ajaki meimer."